

觀無量壽佛經演誦集

了公署



中華民國二十八年四月初版

△每部定價國幣二角▽

(外埠酌加郵費)

演述者

戴

兆

年

編訂者

范

古

農

出版者

上海佛學書局

代表 沈彬翰

印刷者

國光印書局

上海新大沽路口

電話三三七四三

發行者

上海佛學書局

分發行所

佛學書局分局

北平分局：西安門大街四十九號
重慶分局：佛學社經流通處
南昌分局：佑民寺經流通處
青島分局：福山路五十八號
昆明分局：武成路五十八號
營口分局：和興街佛經流通處
香港分局：丹絨巴葛普陀寺佛經流通處
新加坡分局：丹絨巴葛普陀寺佛經流通處

廣州分局：花塔街六榕寺佛教會經坊
汕頭分局：昇平路八十八號佛經流通處
漢口分局：古樓街佛經流通處
成都分局：又新街三寶佛經流通處
寧波分局：東新街三寶佛經流通處
天津分局：中山路三號佛經流通處
西安分局：南大街三號佛經流通處
哈爾濱分局：西三馬路佛經流通處
長春分局：西三馬路佛經流通處

校對者姚傳音

編訂序

淨宗三經，無量壽經、阿彌陀經、觀無量壽佛經也。晚近淨宗透機，三經講義，年必數起。而弘法心切者，欲求文字之普及，將經文演爲白話解義，始於黃慶潤先生之彌陀經白話解，繼作者爲胡宅梵居士之無量壽經白話解，而於觀經之白話解，尙付闕如。戊寅九秋，湘潭戴兆年居士寄來觀經白話稿，囑爲校閱。讀歎隨喜，以爲得此解而三經之白話解畢具矣，寧非快事。時適上海佛教居士林邀講經，遂即以戴稿爲根據，以白話演講觀經，聽者便之，講畢錄出，卽以爲戴稿之修正，足以副戴居士之志矣。然白話演講，但爲便俗，而原經正文，實爲典要，且讀誦所資，何可偏廢，故宜冠首而次白話，又以白話演講，隨順經文。凡科判之分文，名詞之解義，梵名之譯意，法數之臚舉，亦爲解經所必需，因爲之編訂而附益之，庶幾於讀經解義，章句名詞均無遺憾，質諸戴君亦頗贊許，而是編遂以告成。值今刊行之際，敘其緣起，知非偶然也。今而後淨宗三經俱有白話解義，或者淨宗因茲更得發展乎。

觀無量壽佛經白話演講集 編訂序

民國二十八年佛成道日范古農和南序

觀無量壽佛經白話演講集

目次

編訂序	一—二
經文	一—三
白話	一—四
補編	一
一 觀經略科	一
二 十六觀表	二
三 觀經詞義	二
四 觀經梵名	四
五 觀經法數	六

佛說觀無量壽佛經

劉宋西域三藏法師罽良耶譯

如是我聞。一時佛在王舍城耆闍崛山中。與大比丘八千二百五十人俱。菩薩三萬二千。文殊師利法王子而爲上首。

爾時王舍大城有一太子。名阿闍世。隨順調達惡友之教。收執父王頻婆娑羅。幽閉置於七重室內。制諸羣臣。一不得往。國太夫人。名韋提希。恭敬大王。澡浴清淨。以酥蜜和麁。用塗其身。諸瓔珞中。盛葡萄漿。密以上王。爾時大王。食麁飲漿。求水漱口。漱口畢已。合掌恭敬。向耆闍崛山。遙禮世尊。而作是言。大目犍連。是吾親友。願興慈悲。授我八戒。時目犍連。如鷹隼飛。疾至王所。

日日如是。授王八戒。世尊亦遣尊者富樓那。爲王說法。如是時
間。經三七日。王食麯蜜。得聞法故。顏色和悅。時阿闍世問守門
者。父王今者猶存在邪。時守門人白言。大王。國太夫人身塗麯
蜜。瓔珞盛漿。持用上王。沙門目連及富樓那。從空而來。爲王說
法。不可禁制。時阿闍世聞此語已。怒其母曰。我母是賊。與賊爲
伴。沙門惡人。幻惑咒術。令此惡王多日不死。卽執利劍。欲害其
母。時有一臣。名曰月光。聰明多智。及與耆婆。爲王作禮。白言。大
王。臣聞毗陀論經。說劫初以來。有諸惡王。貪國位故。殺害其父。
一萬八千。未曾聞有無道害母。王今爲此殺逆之事。汙刹利種。
臣不忍聞。是旃陀羅。我等不宜復住於此。時二大臣說此語竟。

以手按劍。卻行而退。時阿闍世。驚怖惶懼。告耆婆言。汝不爲我
邪。耆婆白言。大王。慎莫害母。王聞此語。懺悔求救。卽便捨劍。止
不害母。勅語內官。閉置深宮。不令復出。時韋提希。被幽閉已。愁
憂憔悴。遙向耆闍崛山。爲佛作禮。而作是言。如來世尊。在昔之
時。恆遣阿難來慰問我。我今愁憂。世尊威重。無由得見。願遣目
連。尊者阿難。與我相見。作是語已。悲泣雨淚。遙向佛禮。未舉頭
頃。爾時世尊。在耆闍崛山。知韋提希心之所念。卽勅大目犍連。
及以阿難。從空而來。佛從耆闍崛山沒。於王宮出。時韋提希。禮
已舉頭。見世尊釋迦牟尼佛。身紫金色。坐百寶蓮華。目連侍左。
阿難侍右。釋梵護世諸天。在虛空中。普雨天華。持用供養。時韋

提希。見佛世尊。自絕瓔珞。舉身投地。號泣向佛。白言。世尊。我宿何罪。生此惡子。世尊復有何等因緣。與提婆達多。共爲眷屬。唯願世尊。爲我廣說無憂惱處。我當往生。不樂閻浮提濁惡世也。此濁惡處。地獄餓鬼畜生盈滿。多不善聚。願我未來。不聞惡聲。不見惡人。今向世尊。五體投地。求哀懺悔。唯願佛日。教我觀於清淨業處。

爾時世尊。放眉間光。其光金色。徧照十方無量世界。還住佛頂。化爲金臺。如須彌山。十方諸佛淨妙國土。皆於中現。或有國土。七寶合成。復有國土。純是蓮華。復有國土。如自在天宮。復有國土。如玻瓈鏡。十方國土。皆於中現。有如是等無量諸佛國土。嚴

顯可觀。令韋提希見。時韋提希白佛言。世尊。是諸佛土。雖復清淨。皆有光明。我今樂生極樂世界阿彌陀佛所。唯願世尊教我思惟。教我正受。

爾時世尊。即便微笑。有五色光。從佛口出。一一光照頻婆娑羅王頂。爾時大王。雖在幽閉。心眼無障。遙見世尊。頭面作禮。自然增進。成阿那含。

爾時世尊。告韋提希。汝今知不。阿彌陀佛。去此不遠。汝當繫念。諦觀彼國。淨業成者。我今爲汝廣說衆譬。亦令未來世一切凡夫。欲修淨業者。得生西方極樂國土。欲生彼國者。當修三福。一者。孝養父母。奉事師長。慈心不殺。修十善業。二者。受持三歸。具

足衆戒。不犯威儀。三者發菩提心。深信因果。讀誦大乘。勸進行者。如此三事。名爲淨業。佛告韋提希。汝今知不。此三種業。乃是過去未來現在。三世諸佛淨業正因。

佛告阿難及韋提希。諦聽諦聽。善思念之。如來今者。爲未來世一切衆生。爲煩惱賊之所害者。說清淨業。善哉韋提希。快問此事。阿難。汝當受持。廣爲多衆。宣說佛語。如來今者。教韋提希。及未來世一切衆生。觀於西方極樂世界。以佛力故。當得見彼清淨國土。如執明鏡。自見面像。見彼國土極妙樂事。心歡喜故。應時卽得無生法忍。佛告韋提希。汝是凡夫。心想羸劣。未得天眼。不能遠觀。諸佛如來。有異方便。令汝得見。時韋提希白佛言。世

尊。如我今者。以佛力故。見彼國土。若佛滅後。諸衆生等。濁惡不善。五苦所逼。云何當見阿彌陀佛極樂世界。

佛告韋提希。汝及衆生。應當專心繫念一處。想於西方。云何作想。凡作想者。一切衆生。自非生盲。有目之徒。皆見日沒。當起想念。正坐西向。諦觀於日欲沒之處。令心堅住。專想不移。見日欲沒。狀如懸鼓。既見日已。閉目開目。皆令明了。是爲日想。名曰初觀。

次作水想。見水澄清。亦令明了。無分散意。既見水已。當起冰想。見冰映徹。作瑠璃想。此想成已。見瑠璃地。內外映徹。下有金剛七寶金幢。擎瑠璃地。其幢八方。八楞具足。一一方面。百寶所成。

一一寶珠。有千光明。一一光明。八萬四千色。映琉璃地。如億千日。不可具見。琉璃地上。以黃金繩。雜廁間錯。以七寶界。分齊分明。一一寶中。有五百色光。其光如華。又似星月。懸處虛空。成光明臺。樓閣千萬。百寶合成。於臺兩邊。各有百億華幢。無量樂器。以爲莊嚴。八種清風。從光明出。鼓此樂器。演說苦空無常無我之音。是爲水想。名第二觀。

此想成時。一一觀之。極令了了。閉目開目。不令散失。唯除食時。恆憶此事。如此想者。名爲麤見極樂國地。若得三昧。見彼國地。了了分明。不可具說。是爲地想。名第三觀。佛告阿難。汝持佛語。爲未來世一切大衆欲脫苦者。說是觀地法。若觀是地者。除八

十億劫生死之罪。捨身他世。必生淨國。心得無疑。作是觀者。名爲正觀。若他觀者。名爲邪觀。

佛告阿難及韋提希。地想成已。次觀寶樹。觀寶樹者。一一觀之。作七重行樹想。一一樹高八千由旬。其諸寶樹。七寶華葉。無不具足。一一華葉。作異寶色。瑠璃色中。出金色光。玻瓈色中。出紅色光。碼碯色中。出硨磲光。硨磲色中。出綠真珠光。珊瑚琥珀。一切衆寶。以爲映飾。妙真珠網。彌覆樹上。一一樹上有七重網。一一網間。有五百億妙華宮殿。如梵王宮。諸天童子。自然在中。一童子。五百億釋迦毗楞伽摩尼。以爲瓔珞。其摩尼光。照百由旬。猶如和合百億日月。不可具名。衆寶間錯。色中上者。此諸寶

樹行行相當。葉葉相次。於衆葉間。生諸妙華。華上自然有七寶果。一一樹葉。縱廣正等二十五由旬。其葉千色。有百種畫。如天瓔珞。有衆妙華。作閻浮檀金色。如旋火輪。宛轉葉間。涌生諸果。如帝釋餅。有大光明。化成幢旛。無量寶蓋。是寶蓋中。映現三千大千世界。一切佛事。十方佛國。亦於中現。見此樹已。亦當次第一一觀之。觀見樹莖枝葉華果。皆令分明。是爲樹想。名第四觀。次當想水。欲想水者。極樂國土。有八池水。一一池水。七寶所成。其寶柔軟。從如意珠王生。分爲十四支。一支作七寶妙色。黃金爲渠。渠下皆以雜色金剛。以爲底沙。一一水中有六十億七寶蓮華。一一蓮華。團圓正等十二由旬。其摩尼水。流注華間。尋

樹上下。其聲微妙。演說苦空無常無我諸波羅密。復有讚歎諸佛相好者。如意珠王。涌出金色微妙光明。其光化爲百寶色鳥。和鳴哀雅。常讚念佛念法念僧。是爲八功德水想。名第五觀。衆寶國土。一一界上。有五百億寶樓。其樓閣中。有無量諸天。作天妓樂。又有樂器。懸處虛空。如天寶幢。不鼓自鳴。此衆音中。皆說念佛念法念比丘僧。此想成已。名爲麤見極樂世界寶樹寶地寶池。是爲總觀想。名第六觀。若見此者。除無量億劫極重惡業。命終之後。必生彼國。作是觀者。名爲正觀。若他觀者。名爲邪觀。

佛告阿難及韋提希。諦聽諦聽。善思念之。吾當爲汝分別解說。

除苦惱法。汝等憶持。廣爲大衆分別解說。說是語時。無量壽佛住立空中。觀世音大勢至。是二大士。侍立左右。光明熾盛。不可具見。百千閻浮檀金色。不得爲比。時韋提希見無量壽佛已。接足作禮。白佛言。世尊。我今因佛力故。得見無量壽佛及二菩薩。未來衆生。當云何觀無量壽佛及二菩薩。佛告韋提希。欲觀彼佛者。當起想念。於七寶地上。作蓮華想。令其蓮華。一一葉上。作百寶色。有八萬四千脈。猶如天畫。脈有八萬四千光。了了分明。皆令得見。華葉小者。縱廣二百五十由旬。如是蓮華。具有八萬四千葉。一一葉間。有百億摩尼珠王。以爲映飾。一一摩尼珠。放千光明。其光如蓋。七寶合成。徧覆地上。釋迦毗楞伽寶。以爲其